

Omna jibeto esas mala por la yuna proskriptito!

SONNY TABOR
YE LA JIBETO-DOMENO
da **WARD M. STEVENS**



Unesme publisita 20 novembro 1937
en la jurnalo *Wild West Weekly*.

Ica tradukuro
Creative Commons 2020 by Brian E. Drake
Attribution-NonCommercial-ShareAlike 4.0 Unported
International

The Oxford Rationalist
56 Albany Street
Oxford, NY 13830 USA
(607) 843-2636
brian.eric.drake@gmail.com

SONNY TABOR **YE LA JIBETO-DOMENO**

DA WARD M. STEVENS
(PAUL S. POWERS)
AUTORO DI "TERORO KAVALKAS LA KVALET-POSTO", EDC.

TRADUKITA DA BRIAN E. DRAKE

CHAPITRO I.

LA PROPRIETANTO DIL TRABO-T.

La proprietanto dil Trabo-T-domeno juabis tro multa alkoholaji. La dio esis brulante varmega; quankam esis nur matinomezo, la dezerto di Arizona esis cintilifanta furnazo di brilanta varmegeso, e plu saja homo drinkus biro, o plu bone, aquo. Ma Jo Kulun ekvarsis pura wiskio. Lu esis glorioze, bruisante ebriega, e lu ne suciis pri la konsequo.

La Milit-Danso-drinkeyo, quankam male reputata, semblis koldeta ed agreabla oaziso kompare a la boliiganta suno exter l'edificio. Konstruktite ye kruco-voyo, ol esis longa edificio havanta dika muri ek bakigita briki, ed esis l'unika domo de irga sorto en multa kilometri. To forsan explikas pro quo la

kustumale sorgema domenisto pasabis ultre sua limiti.

Esis plura altra viri en la loko ed, ecepte un, li omna drinkis kun lu—Jo Kulun pagis. Ta eceptajo esis pueratra bovgardisto weranta blue quadratizita kamizo e bruna getri qua stacis sole ye l'extremajo dil drink-tablo. Lu nerapide drinkis koldeta glaso de aquo, ed extere, en l'ombro dil drinkejo, ilua nigre e blanke makulizita kavaletto vartis ilu.

Jo Kulun ludis per un-dolara pario-mashino, tiris la levero rapide e kun bruisoza entuziasmo. Til lore la mashino pagabis nulo, ma la domenisto havis granda manuedo de arjenta dolari e konstante ed esperante pulsus li unope aden la boko dil aparato.

Ol esis ekmoda mashino havanta grandega horlojatra plako markizita per diversa kolori. Redo e nigro pagas egala premio, verdo pagas kinople, flavo pagas dekople, e blanko pagas duadekople.

“Djafoye, yunuli, me ludash por la flavo,” la domenisto neklare dicis.

Lu forte tiris la levero, la roto vertijigante rotacis dum kelka instanti, ed haltis ye verdo.

Jo Kulun ne esis senkurajigita. Lu enpulsis plusa dolaro, tiris la levero, avide vartis. Cafoye lu ludis por verdo. Ma la mashino diablatre haltis ye flavo.

“Yunulo, ol certe repetosh,” Jo guturridis, preske tam felica kam se lu ganabus. “Me vertijigash ol nun. Ol djerte repetosh. Nur spektej.”

Ma la mashino esis evidente plu sobra kam la kliento. Ol haltis ye redo.

Jo Kulun esis pezoze formacita viro evanta preske kinadek yari. Lua vizajo, reda pro drinkaji, altratempe esas agreabla, mem bela. Lore lu kelke shancelis, e divenis sempre plu ebria.

Flatachante zumante cirkum l’ebriulo quale hungranta mushi esis tri viri de la Jibeto-domeno, tale nomata pro olua stranja brul-marko, qua aspektas quale la jibeto di mortiganta pendero, esante buxo sub la renversita litero L. Ta homi esis “Red” Hunt, Bill Prim, e Webb Stuart; ta laste nomizita esis la laboristestro dil domeno.

La trio havis maligna vizaji, aspektis plue quale profesionala pafisti kam bovgardisti. Stuart esis partikulare repugnanta. Lu esis obskura viro, mezalta, havanta nazo quale la beko di falkono, boko kun dina labii, e ruzema okuli qui ne palpebragas. Lu portis

pafilo havanta ivora kroso sub sua sinistra axelo en shultro-revolveruyo, ed altra pafilo esis ligita an la dextra hancho.

“Shupozash, ke me ludej nur la redo o la nigro,” Kulun fole ridetachis, faligis du o tri arjenta dolari e ne riprenis oli. “Kerlo havosh plu bona chanco per ta du kolori. Omnu drinkej—e dezirej a me fortuna. Yen!”

Lu pezoze shancelis adsur la mashino, preske renversis ol, e fortege tiris la levero. Ma lu pariabis por la nigro, e redo aparis, do lu esis plu povra per plusa dolaro.

Shancelante staceskante, la proprietanto dil Trabo-T strigatre regardegis la kolorizita plako dil aparato, e mustis klozar un okulo por vidar ol.

“Nu, yunuli,” lu anuncis, “djafoye me ludash por la blanko. She blanko ganosh, ol pagosh duadekople! T’ esh multa pekunio. E me konjektash, ke me ganosh.”

Itere lu tiris la levero, la plako rotacis, e Kulun expektante palpebragis. La homi qui parazitesis sur lu por drinkaji desestimante ridetachis dop lua dorso.

La tordita roto lenteskis, tresayis, e kun lauta klikto ferme haltis ye blanko. Jo Kulun dansis shancelanta jigo, rapide turnis

sua chapelego, ed emisis granda ululo triumfala.

“Me tandem ganish!” lu joyegis. “Duadek-e-shep dolari me pozish aden dja shtraba turn-ludilo, e nun me tandem ganash duadekople. Nu, ekdonej!”

Lu pozis sua chapelo ye l’aperturo ek qua duadek arjenta dolari devas fluar. Ma venis nula arjenta tinkleto; venis nulo. Lauta ridego venis de la Jibeto-bovgardisti e la drinkifisto. La sola eceptajo esis la yuna homo ye l’extremajo dil drink-tablo. La stupida, perplexa expresuro sur la vizajo dil granda domenisto semblis a l’altri tote komikal.

“Quo esh?” Kulun murmuris, akuzante turnis su vers la drinkifisto, grasulo havanta reda vizajo e weranta sordida avan-tuko. La rideto dil domenisto mortabis, e lua karnoza mandibulo obstineme saliiis.

“Ho, ka me obliiviis informar tu, Jo?” la drinkifisto explikis. “Ta mashino ne funkcias. Ol ne funcionis de pos plu kam un semano. Yen, me donas a tu tua perdita dolaro, amiko,” e lu jirigis moneto-peco trans la drink-tablo vers la domenisto.

Oblivante omna altra dolari vane varsita aden la pario-mashino, Kulun jeneroze

ridetis e presis la nemuskulala manuo dil drinkifisto. Lu es mea amiko, pensis Kulun. Omnu es mea amiko.

“Ton me nomash honeshatesho, tale retrodonar mea pekunio,” lu totkordie aprobis. “Ni omnu drinkej plusha drinkajo, omnu.”

La glasi esis riplenigita per wiskio—la “makshim bona en la domo,” quankam to ne multe signifika pro la mala qualeso di ol. Dum ke ol varsesis, la homi dil Jibeto-domeno frapetis la dorso dil perplexa proprietanto dil Trabo-T e dicitis, quante bona kerlo lu esas. Webb Stuart mem pluse dicitis:

“Tu savas, Jo, ke me camonate kelke mankas kontanto.” Lu mokridetis. “Me pensis pri demandar de tu mikra prestajo por helpar me. Duacent o triacent dolari multe helpus me, Jo, e pro ke tu e me esis sempre tante bon amiki—”

“Ho, Jo ya helpos tu, ka ne, Jo?” urjis Red Hunt, e palpebragis ye la laboristestro dil Jibeto-domeno. “Pekunio ne importas a tala homo quala Jo Kulun. Nu, lu vendis granda bovtrupo prehiere. Lu certe ganis grand amaso de kontanto por ol. Ka ne, Jo?”

Kulun esis tro ebria por komprenar, ke lu fraudesas. Lu ektiris sua burso, e l’okuli dil

trio de la Jibeto-domeno avide brilis vidante la kontenajo. Kulun ektiris triacent dolari en bank-bilieti de kinadek dolari e transdonis olti a Stuart. E multo restis. Mili de dolari, supozis l'envidiema bovgardisti dil Jibeto-domeno.

Webb Stuart aceptis la bank-bilieti sen dankar—preske desafable, quale se lu regretas ne demandir plu multa.

Unesmafoye Kulun remarkis la yuna nekonocato qua taceme stacas ye l'extremajo dil drink-tablo. La domenisto palpebragante regardis ilu.

“Pro quo *lu* ne drinkash kun me?” lu questionis Stuart. “Me volash ke omnu drinkej.”

La grupo del Jibeto-domeno ne intencis ke altru intruzez su en lia “ludo.” Stuart desestimante regardis la yunulo.

“Lasez lu tranquila, Jo,” lu dicis, levante sua shultri. “Es nur yuno.”

Ma se Stuart e lua komplikuli savabus advere qua esas ta yuno, li plu atenceme regardus il. Il esis un de la maxim timita proskriptiti en la Sudwesto, “Sonny” Tabor. Esis premio de sisamil dolari por il, mortinta o vivanta. Il esabis dufoye kondamnata esar pendigita, ed il mortigabis

plu multa homi, on dicas, kam la nombro di ilua fingri e pedfingri.

Ya esis nulo dil malulo en l'aspekto di Tabor. Il evis duadek-e-du o duadek-e-tri yari, ma aspektis esar mem plu yuna. L'anciena kuglo-cikatro en un bronzea e ronda vango aspektis quale fendureto, ed ilua blu okuli esis inocenta e milda.

Base rimenizita ye singla kruro esis Colt .45-revolvero, lenta e pezoza armo en la manuo di novico, ma la maxim rapida e maxim mortigiva de omna pafili kande uzata dal experto. Du municion-zoni transiris ilua tayo, la ledra slingi plena de kugli.

Il weris kremea Stetson-chapelo e mikra "Coffeyville"-a boti. La vestaro esis ordinara. Nulu supozus, ke il esas "serchata" homo.

Jo Kulun pezoze shancelis vers ilu, la brovi frunsita.

"Pro quo tu ne drinkash, kindo?" lu grunis. "Tu ne drinkash kun olda Jo, ka? Pro quo—"

"Me ne drinkas alkoholaji," Sonny dicis, koncianta ke l'okuli di Stuart e lua amiki severe regardas il.

La proskriptito kompatis Jo Kulun. Fugero, tala quala il esas, mustas esar bona

judikanto pri karakteri homal, ed il komprenis ke la domenisto, kande sobra, esas decanta homo, honesta e yusta. E Sonny anke komprenis quala sorto de vulturi esas la Jibeto-homi.

“Ne drinkash, ka yesh? Nu, yunulo, esh bona!” totkordie aprobis Kulun, e pozis manuo adsur la shultro di Sonny. “Me ne prizash vidar yunulo qua drinkash. Me ipsha havash filiulo preshe tam evoza kam tu. Me joyash ke tu ne drinkash. Ka tu volash laborar por me che la Trabo-T, *muchacho?*”

Stranje—o l’autoritatozi opinionus ke lo esas stranja—Sonny Tabor ya serchas honesta employo ye domeno. Il ne esis proskriptito pro deziro esar proskriptito. Se Kulun esabus sobra, il rapide acceptus tala ofro. Ma il lore hezitis. La domenisto ne esis en bona stando engajar ulu, e Sonny ne deziris explotachar lu.

“Nu, qua reshpondo, kindo?” urjis la domenisto. “Me nun bezonash bon helpanto.”

Sonny deziris salvar Kulun de ta vulturi, se posible, nam il komprenis ke li komplotas tote spoliar lu.

“Nu, bonege, sioro,” il nelaute dicis. “Me acceptos ta laboro, kondicione ke vu duktos

me a la domeno—nun. Me ne savas, ube ol esas.”

“Nu, yesh ya, yunulo, me nur—”

Webb Stuart venis alonge la drink-tablo por akular sua chasajo. Sonny remarkis ke un de lua sporni, havanta elegante skultita ledri, ne esas fixigita, e skrachas la planko-sulo. La vizajo dil laboristestro esis pala pro iraco, e la regardo sendita a la proskriptito esis ocidiva.

“Jo Kulun drinkas kun ni, kurtigito—ka tu komprenas?” lu rauke dicis. “Venez, Jo; me jus komendis plusa drinkajo!”

Oblivianta engajar bovgardisto por la Trabo-T, Kulun forshancelis kun Stuart, e Sonny Tabor, komprenante ke salvar la domenisto de ta sanguisugi—e de lu ipsa—esas vana, ekiris la Milit-Danso ed iris a sua kavaletto vartanta.

“Ni trovez voyeto, Fardo,” il sospiris, ed ocilante acensis a la selo. “Me ne supozas, ke me itere vidos ta homo Kulun.”

Ma il destinesis itere vidar lu, en diferanta e plu mala cirkonstanci.

CHAPITRO II.

ESKAPAR L'AUTORITATOZI

Sonny esis vaganto, ed il kustumale vagis jus avan l'autoritatozi. Irge qua voyeto il alongiris, l'ombro dil slingo dil pendero semblis transirar ol. Morto celis su dop omna meskit*-amaso. Omna oficiro en la Teritorio havis ilua deskripturo, ed havis komando pafar—por mortigar.

De pos ilua dek-e-quaresma yaro il esis fugero. La plumulto de yuna bovgardisti divenabus malignuli, ma l'anmo di Sonny restis netordita. Ed il ankore esis kapabla ridetar.

Il e Fardo, ilua tenue muskuloza, makulizita kavaletto, iris alonge neklara voyeto qua duktas adweste vers la seglatra kateno de lavao-monti stacanta, quale blu-bruna sentineli, ye la horizonto. La regiono

* *Prosopis*.

esis desplata, ruptita, e bakis en la varmegeso di someromezo.

Sonny trovis ke il gutur-ridas malgre la decepto. Quante stranja decepto! Il multe bezonas employo, ma esis ofrita employo da homo tro ebria por komprenar to quon lu dicas.

“Lu devas gardar su, tamen,” la proskriptito murmuris. “Me ne prizas l’aspekti di lua amiki.”

Esabis seneventa semano por Sonny. Il eskapabis oficir-bando en Yavapai-stat-distrikto, cirklatre irabis adeste e pose adsude sen audar mem aboyo de pafilo. Sonny joyis pro ta intervalo. Forsan kelka pacoza semani venos ad il.

“Forsan venos tempo, Fardo,” il reveme dicitis, “kande ni ne sempre fugos.”

Ye dimezo il trovis su sur dezerta planajo ube la meskiti esis velkinta e larje separita. Esis nula shirmivo de irga sorto; ne mem saguar*-kaktuso interruptis la monotoneso dil planajo. Direte avane esis la stonozza monto-kateno kovrita per areanatra okotilyi** ed amasi de opuntii†.

* *Carnegiea gigantea*.

** *Fouquieria splendens*.

† *Opuntia littoralis*.

Sonny distis apene un duimo di kilometro de ta rokajo kande il vidis du kavalkanti qui aparas de dop ol. Un de li tenis Winchester-fusilo trans la selo.

Oficiri! L'instinti di Sonny esis preske supernature akuta; li esis l'instinti di chasajo. La yari kom proskriptito docabis multo ad il; il povis rikonocar autoritat-oficiro preske tam fore kam videble, ed il lernabis rapide decidar. Probable ta viri esas Arizona-Guardani*.

Nula viri esis plu danjeroza. La Guardo, qua patrolas regiono plu granda kam Nov-Anglia per nur kelka homi, esas efikiva, mortigiva a proskriptiti. Sonny lernabis lo. La Guardani esas luktisti, viri qui kustumale kaptas lia chasajo.

La cerebro dil proskriptito rapide funcionis. Per regardeto il evaluis la situaciono, ed instantale decidis bravar ol. Se il nun turnus Fardo por forkurar—nu, la kavaletto esas rapidega, ma la kugli di .30-30 Winchester esas plu rapida! Pluse, restis chanco ke ta Guardani ne rikonocos il. Plu kam un oficiro qua memore savis la deskripturo di Sonny esabis deceptata da

* Membri dil stat-policistaro en l'Usana Westo.

Sonny ipsa. Do il kavalkis direte adavane, nek plurapideskis nek lenteskis.

“Kalme, Fardo, e retenez tua shui,” il susuris. “Ni forsan mustos agar.”

La Guardani vidabis Sonny ed haltabis en la voyeto. Ta qua havis la fusilo abasis ol, e l'altra oficiro rulante facis sigareto. La proskriptito plu tranquile respiris. Li vartas por parolar, ma tote ne savas qua il esas; se li savus, li ne tante sensucie sidus sur lia seli.

Plu base tirante la bordo di la Stetson-chapelo, quale se por shirmar ilua okuli de la brilego dil suno, Sonny pluproximeskis a la danjeroza instanto. Il lore esis preske apud li, ed il remarkis, ke un de la kavalkanti esas tre altstatura e magra, e l'altra esas kurta e dika. La du sunbrulita vizaji stranje similesis l'una l'altra; li havis la sama griza e kalma okuli, la sama harda e muskuloza mandibuli.

“Haltez, yunulo!” imperis la plu alta homo. “Ni es Guardani.”

Sonny afable haltis, tre rapide, nam il ne deziris venar plu proxime a ta du!

“Yes, sioro,” il rapide dicis.

Ilua pulso kuregis, ed il savis ke Fardo anke esas nervoza. L'inteligenta kavaletto povis sentar l'autoritatozi tam senerore

kam il ipsa, ed il sentis la muskuli dil makulizita kavalo tremar. Un vorto, un tusho, sendus Fardo kuregar quale polvo-vortico!

“Ka tu habitas ca vicineyo?” la kurta Guardano questionis.

“Trans la monto-kateno,” la proskriptito kurte respondis.

“Ka tu konocas homo nomizita Webb Stuart?” la plu alta oficiro questionis.

La kordio di Sonny plu normale pulsis. “Ne povas responder yes,” il dicis. “Me regretas.”

Il volis kavalkar adavane, ma ne volis semblar tro anxioza. Il vidis, ke l’alta Guardano lektas papero.

“Ka tu povas dicar, ube es la Jibetodomeno?” lu grunis. “Ni audas ke ta Stuart es ibe employata.”

“Me timas, ke me anke ne povas helpar pri to,” la proskriptito lente dicis, e decidante ke nulo plusa esos demandata, il urjis Fardo avancer.

“Vartez dum instanto, yunulo!” subite klamis la dika oficiro, e mem parolante lua voco semblis esar acendita. Ol kontenis astonata anhelo. “Vartez, tu! Per Deo, tu esas—”

“Lu es—es Tabor!” aboyetis l’alta Guardano.

La magra manuo dil oficiro hastis vers la Colt en la revolveruyo ye lua hancha. La kurta Guardano havanta la Winchester leveskis ol! Omno nun finos!

Bang! La tondro di .45-revolvero resonis trans la planajo.

La rapida flagro di flamo saltis ek la boko di un de la pafili di Sonny Tabor. Il ektirabis tante rapide, ke l’okuli ne povis trasar ol.

Sonny ne pafis ye l’oficiri—por mortigar—e la kuglo nur brulis tra la fingri dil altstatura Guardano. To suficis, tamen, por domajar la apunto dil Guardano, e to donis a Sonny kelka precoza sekundi. La kurta homo havanta la fusilo esis lenta, e lua kavalo kabris pro la bruiso dil pafado e violentoze saltis.

La kavaletto di Sonny Tabor chanjis, dum un respiro, de pacoza dorlotata bestio a sturm-vento!

Snortante, Fardo foriris! Olua hufi kune saltis aden la aero—quale se la kavalo fulas vipero—ma tushante la tero, li spricigis gravio!

“Ni—kurez!” anhelis la proskriptito, ed abasis su sur la selo.

E la makulizita kavalo kuris! Ol zigzagis; ol kurbetis, ol valsis. Quale nigra e blanka kuniklo, ol kuregis trans la monto-kateno ed ultre ol, jirante e dansante—quale la vento!

Sonny sempre suspektis, ke Fardo tote juas kurenar kontre morto. Plu kam obediemeso o timo igas kavalo tale kurar.

La du Guardani, rekuperante su de lia astoneso, varme pafis. Sonny ne bezonis multe timar la pafado de la revolveri, ma la fortega Winchester-fusilo minacis. Il audis kugli cirkume zumar quale ruptanta kordeti di violino, vidis sablo-sprici omnube.

L'autoritatozi persequis, ma Sonny ne multe anxiis pro to. Per Fardo il havas rapidega kavalo saja pri la dezerto, kavalo qua povas montrar la taloni ad omno sur gambi.

Sonny sendis la kavalo flugante aden ravineto, adsupre ye la fora rivo, ed aden yukopso. La kugli lore cesis venar; l'oficiri apene povis persekar il.

“Bonega laboro, amiko!” la proskriptito murmuris. “Ni vertijigas li.”

Kelki savis la dezerto tam bone kam Sonny, nam ol esis ilua hemo dum multa danjeroza yari. Ed il anke savis omna habila stroko pri kavalkado, omna savaji dil

Apache-indijeni. Pos evitir dum un horo, il esis ultre persequo.

Unesmafoye il havis oportunajo pensar. To esis danjeroza eskapo, ed il tro bone konocis la karaktero di ta Guardani por supozar, ke li abandonos la chaso. Multa danjero restas.

L'unika posiblaĵo di Sonny esis deceptar la persistanta persequanti, se posible. Li komprenende ekspektos ke il iros tam fore kam posible de la loko ube il esis preske kaptita. Il decidis facar lo kontrea, retroirar a ta loko. Per larĵa arko il itere iros adeste.

Stuart! To esas la nomo di ta homo en la Milit-Danso, ka ne? la fugero pensis. Ed esas lu quan li serchas!

L'adesta arko duris dum du hori, cirkume, nam il lente kavalkis e kovris sua traci tam bone kam posible. Facante lo, il esis tam ruzema kam indijeno. Il esis sempre alerta, ma vidis nula signo di la Guardani.

La posdimezo pasis, e pro ke la dio esis lore maxim varmega, il leĵere kavalkis, lasis Fardo havar multa tempo por reponar pos ta ardua kuro.

Il jus enirabis ravineto ube la kreozot-
arbusti* kreskis alte e dense, kande il vidis
ulo qua igis il rigideskar sur sua selo.
Nauzeigita, il haltigis Fardo. Dum ilua tota
vivo, la proskriptito ne experiencabis tala
shoko di hororo, iraco, e kompatato.

* *Larrea tridentata*.

CHAPITRO III.

OCIDO!

Sternita en dezerta loko, vizajo vers la cielo, esis la kadavro di Jo Kulun. Leda vunduro beis en lua dextra temporo, tenita en lua rigideskanta dextra manuo esis lua Colt-revolvero. Semblis esar suocido.

Sonny Tabor, tamen, konjektis ke ol ne esas suocido. Il sorgeme cirkumregardis, e pos certigir ke nulu asistas, lu decensis por inquestar.

La domenisto esis mortinta, il judikis, plu kam un horo ante lore. Formiki ja deskovris la kadavro, e mushi zumis e reptis sur la vizajo di Kulun. L'okuli esis apertita e regardegis, la mandibulo beis e sablo esis en la boko, quale se la mortantulo luktabis.

Il exploris la pafilo di Kulun—.44-kalibro. Ol esabis recente pafita, uzita kartocho esis sub la perkutilo, e la boko odoris de pulvero. Ma to esis dupigo. L'ocidinti

pafabis ol—probable aden la aero—e pose pozabis ol en la manuo dil mortintulo.

Nur habila okulo trovus irga traco, nam omna traci esabis sorgeme forbalayita. Ma Sonny trovis multo interesanta. Tri kavalkanti partoprenis ca ocido. Ed il bone kojektis, qui esas ta tri homi.

Il traserchis la kadavro e trovis la burso di Kulun. Ol esis vakua ecepte kelka ricevatesti. L'ocidinti volis krear l'impresuro, ke l'ebria domenisto spensabis omna sua pekunio e pose remorsoze suicidis.

Esis plusa deskovrajo—grava deskovrajo. Dek-e-du metri de la kadavro, mi-kovrita per sablo, esis arjentea kozo, sporno perdita da ulu. La proskriptito quik rikonocis ol, nam la ledro esis elegante skultita. Ol esis olta di Webb Stuart, e Sonny enposhigis ol kom pruvo.

“Es mala, Fardo, ke ni vice la Guardani trovis ico,” murmuris la fugero, e ponderis to quo esas facenda.

Se il livus Kulun sternita, la kadavro forsan nultempe trovesos, o ne til ke l'uceli e reptanti dil dezerto igabos identifikio neposibla. To esus terorinda por la familio, e Sonny rimemoris, ke Kulun parolis pri

filiulo. L'ocidinti, anke, takaze nultempe esos punisita.

“Ni mustas riskar, Fardo,” il decidis.

Kun ula defacilesa, nam Kulun esis pezoza homo, la proskriptito hisis Kulun adsur la dorso di Fardo. Il tote ne savis ube esas la Trabo-T-domeno di Kulun, ma konjektis ke Jo iris vers sua hemo kande la mortigonti rajuntis lu.

Sonny regardis la cirkondajo, lore iris direte adsude, duktante la charjita kavalo. Fore, rango de arbori markizis aquo-fluo. To semblis esar sat probabla direciono.

La suno kushis su kande Sonny Tabor vidis la dispersita edifici di domeno. La dezerto esis min varma, la westo karmezine brilis, e l'akute skultita blua monti aspektis quale petrigita fumo.

Sonny ne savis, ka la avana domeno esas to di Kulun. Segun ilua savo, ol forsan esas la Jibeto-domeno. Se yes, il esos varmege aceptata! Tamen, il supozis ke ol esas la Trabo-T; la kelka bovi vidita portas la Trabo-T brul-marko.

Tri bovgardisti laboris en un de la bovinkluzeyi proxim la domo, ed il vidis ke li haltas e regardegas. Un de li klamis, e quaresma homo—yunulo evanta ne plu kam dek-e-sis yari—kuris ek un de la hangari.

“Lu certe habitis hike,” pensis Sonny, e quankam il savis nulu de ta homi, il sentis simpatio-doloro por li.

“Se to es mea patro,” kriis la yuna bovgardisto, qua kuris avan l’altri, “me deziras ke tu ne adportis lu en tala stando.” Lu esis magra yunulo havanta fatigita okuli. “Me ne volas ke matro vidus—”

Sonny komprenis. La yunulo supozas, ke la patro esas nur ebria. To explikis l’iracoza tono en lua voco, la redesko dil magra vangli.

“Ne esas tale quale tu pensas, amiko,” Sonny dicis dum ke la juniora Kulun proximeskis. “Me timas, ke es mala. Tua patro—”

Unesmafoye la yunulo regardis sua patro. Sonny venis en bona tempo por subtenar yuna Kulun per sua brakio. L’orfanigita kindo blankeskis, la genui ne suportis lu, lu semblis kruleskar.

“Tondro!” klamis un de la bovgardisti dil Trabo-T, tre kurta e larja homo havanta reda vizajo. “Jo esis mortigita, per Deo! Qua facis lo? Es—es hororinda!”

Altra laboristo, kalva viro evanta kinadek yari, tre kurva-gamba e tre magra, helpis Sonny portar la kompatinda formo dil mortigita domenisto.

“Ni devas portar lu aden ta hangaro,” lu susuris. “Siorino Kulun—nu, ni devas sorgeme informar el. Kurajez, Jimmy!”

Li portis la kadavro aden la hangaro, e pos pozir ol adsur palio-amaso, la haltigita torento de questioni ekvarsesis. Nur Jimmy Kulun nule questionis: lu esis aplastata da chagreno.

Sonny dicis to quo eventabis en la Milit-Danso-drinkejo ye la kruco-voyo e to quo pose eventis, komprenende sen naracar pri la renkontro kun la Guardani. La homi ecitate askoltis ed iraceskis.

“La Jibeto-bandacho, certe!” klamis l’olda bovgardisto, qua nomesis “Kalvo” Bray. “Nu, ta basranga mofeti!”

“Yen la sporno qua pravas omno,” dicis la proskriptito, e transdonis la pruvo por ke li explorez ol.

L’altra du bovgardisti esis “Kurto” e “Bekaseto”. Sonny prizis la honesta vizajo di Kurto, ma ne multe prizis l’altru. Bekaseto esis yuna viro evanta cirkume duadek-e-kin yari, akneozza, havanta febla mentono ed aquoza okuleti.

“Patro vendis ula bovi recente,” nelaute explikis yuna Kulun pos kelke rekuperir del shoko. “Lu devas havir preske triamil dolari. Esas ya l’ago di Stuart!” lu bitre kriis.

“Nula dubito pri to,” grunis Kurto. “Nu—unesme—qua informos siorino Kulun?”

To esos trista tasko, e quankam Sonny ne evitus ol, il opinionis ke esas plu bona, ke la spozino di Jo Kulun ne informez da nekonocato. Kalvo Bray tandem konsentis responsar pri to.

Dum ke l’olda bovgardisto esis en la domo, Sonny parolis kun l’altri. Jimmy Kulun, kelke rekuperita, dankis la proskriptito. Sonny prizis la filiulo dil domenisto e kompatis lu. Ma kande Jimmy questionis, kad il restos che la domeno, il hezitis.

“Ni—ni bezonos tu, se tu aceptos laboro hike che la Trabo,’ yuna Kulun pregis. “Me bezonos ulu por helpar sorgar mea matro. Me—me apene savas quon facar. Me ne mem savas tua nomo, ma ulmaniere—”

“Me—nomizez me Tab,” la proskriptito dicitis.

Il vidis ke Bekaseto sorgeme regardas il. Esis stranja expresuro sur l’akuta vizajo dil ratatra bovgardisto, expresuro ne prizinda.

Ante ke Sonny decidis pri lo, Kalvo Bray venis ek la domo. Lu gestis ke li enportez la kadavro. Do dulce levante la mortintulo, li portis lu trans la gazono aden la neta salono.

Kelkatempe yuna Kulun esis en altra chambro por konsolacar sua matro. Kalvo Bray, Kurto, e la proskriptito aranjis la kadavro sur la kanapeo tam bone kam posible, pose stacis tenante lia chapeli per lia manui.

Bekaseto ne restis; lu iris. Konsiderante la cirkonstanco, Sonny pensis ke lo esas kelke stranja.

Kande la proskriptito tandem vidis la matro di Jimmy, il decidis ke il ya restos, adminime kurtatempe. Ca domeno esos danjeroza por il; il ne savis quante proxima esas ta Guardani, ma il aceptis la responso, irge quo eventos. Longatempe ante lore il perdabis sua propra matro, ed il facos omno posibla por helpar ca kompatinda, shokata homino—omno posibla.

“Me kavalkos a Piedras por la sherifo*,” solene dicis Jimmy. “Matro, Tab e la kerli restos hike kun tu e helpos tu. Tu ya aceptos ta laboro, ka ne, amiko?” lu questionis Sonny.

“Kelkatempe,” la proskriptito quietigante respondis.

* Oficiro di stat-distrikto Usana qua havas l’autoritato arestar, efikigar juicio, edc.

Il ja donabis la sporno a Kulun—pruvo qua devas pendigar Webb Stuart, se yusteso facesus.

Sonny joyis ke *il* ne esas demandata irar al sherifo. To esabus ... desfacila.

Siorino Kulun, matrала homino havanta tro frue blankigita hararo, kurajoze subisis sua trauro. El gratitudoze presis la manuo dil proskriptito. Sonny mem plue rezolvis helpar el—til la fino.

“Danko, sioro Tab,” el dicis, ed esforcis ridetar. “Tu es tre bona a ni.”

Sonny Tabor esis kurioza: quon el dicus se el savus qua esas ca protektanto.

CHAPITRO IV.

CHE LA SHERIFO.

Piedras, la chefurbo dil stat-distrikto, esis dispersita urbeto havanta duamil habitanti, cirkume, situita en l'alta planajo e cirkondata da splendida monti kovrita per juniperi e flava pini. Quankam ol distis apene duadek kilometri de la dezerto, ol esis sempre koldeta, e la aero esis pezoza per la spicoza parfumo dil foresto.

Ye un extremajo dil chefa strado esis la kontoro dil sherifo e la karcero—mikra ma masiva edificio ek solida petro. E hike, ye kelka minuti pos sep kloki posdimeze, sherifo Will Maz esis hosto di du gastis profesional—“Magro” Arden e “Tub” Kon del Kavalkanta Guardo di Arizona. Maz, flegmoza, pezoze formacita viro evanta plu kam kinadek yari, esis tre ecitata e

perturbata. Lua reda vizajo brilis pro sudoro.

“Nu, se Tabor esas en mea distrikto, me ne audis pri lu!” lu klamis, e pazis retroe ed adavane avan la meskina pupitro. “E me regretas audar ol. Ka tu es certa—”

“Restas nula dubito ke esis lu,” grunis Tub Kon, qua penseme fricionis sua ronda, kerubatra vango e frunsis la brovi ye premio-afisho klovetagita an la parieto dil kontoro.

Ol esis fotografuro di Sonny Tabor e “Serchata—Sisamil Dolari kom Premio” esis skribita sur ol en enorma nigra literi.

“Ni persequis lu por kilometri,” repugnate snortis Magro Arden. “Pafis du dekedui de kugli ye lu, ma, ho ve—”

“Lu eskapis,” tristoze explikis Tub Kon. “Ta yunulo es ruzema, kredez me! E lua kavaleta—”

“Es vana, me timas,” Magro Arden levis sua shultri. “La regiono es tre granda, e la yunulo es tro inteligenta pri kovrar la traci. Ni mustas vartar fortune. Ni forsan esos sat fortuneza recevar sugestajo ube trovar lu. Stranje, ni tote ne expektis renkontrar Tabor hike. Ni venis a tua distrikto por altru, sherifo.”

“Homo nomizita Webb Stuart,” pluse dicis Guardano Kon. “Ka tu konocas lu?”

Sherifo Max palpebragis, lore afirmis per kapsigno. “Me ya konocas lu,” lu kurte dicis. “Lu es laboristestro ye la Jibeto-domeno, en la valo. Malulo, quale on dicas, quankam me nultempe sucesis akuzar lu.”

“Nu, *ni* sucesis,” dicis la plu magra oficiro teritorial, e jetis sua sigareto aden la sputvazo. “Lu esas serchata pro ocido ye Brisbi. Qua es la proprietanto di ca Jibeto-domeno? Stuart certe acensos jibeto por sua fino, yes ya, e ne nur pro la nomo di domeno!”

“La frati Ballister posedas ol—Abe e Jak,” la sherifo dicis. “Ol havas mala reputo. Uli dicas, ke ol esas nesto di bov-furtisti. Komprenende, me havas nula pruvi pri to,” lu hastoze ed exkuzante dicis. “Se me havus pruvi, me longatempe ante nun purigabus ol.”

“Ho, ni kredas lo, sherifo,” dicis Tub Kon kelkete ironioze.

La Guardani savis quale ociema esas ula sherifi, e Maz semblis esar plu blinda kam l’ordinara sherifo, quankam sat honesta.

“Tu devas duktar ni a ta Ballister-domeno, se tu havas libera tempo, sherifo,” dicis Arden, “e ni povas kaptar li canokte.”

“To esos bona,” dicit Maz. Lu staceskis e metis sua nigra Stetson-chapelo. “Me acendos la lampo e lasos ol brilar. Me nur — Ma vartez, qua venas?” lu kriis, dum ke hufi batis la strado avan la karcero ed haltis. “Ulu venas pro afero, me opinionas.”

Taloni di boti kliktis trans la planko trotuaro, e la pordo hastoze apertesis. Enpazis fragila yunulo quan sherifo Max rikonocis kom la filiulo di Jo Kulun. La kindo esis pala, e lua shultri subflexis.

“Saluto, Kulun! Quale me povas servar tu?” benigne questionis Maz. “Kad irgo importas?”

“Yes, sioro,” Jimmy Kulun anhelis. Lua okuli esis trista e tragediala.

“Tu darfes parolar malgre ta homi, Kulun,” la sherifo dicit. “Li es Guardani.”

“Ka ni povas helpar, yunulo?” Magro Arden kurajigante dicit, komprenante ke nula afero ordinara venigas Kulun tanokte.

Ma nulu de la tri oficiri expektis to quon Kulun dicit.

“Mea patro esis ocidita,” lu abrupte dicit. “Lu esis spoliata—mortigita—caposdimeze.”

Maz falis adsur sua sidilo e la du Guardani rigideskis. La sherifo bone konocis la posedanto dil Trabo-T, e la novajo aturdis lu dum instanto.

“Dicez omno,” lu tandem anhelis. “Ka tu irgamaniere savas qua—”

“Yes!” kriis Jimmy Kulun, l’obskura okuli flagranta pro kreskanta furio. “Esis Webb Stuart e lua amiki. Ca sporno esis trovita proxim la kadavro, e patro videsis drinkir kun ta bando en la Milit-Danso-drinkeyo plu frue.”

Dum ke Maz exploris la sporno, Kulun duris naracar to quon lu savis pri l’ocido di sua patro. La du Guardani saltabis ek lia sidili e regardabis l’una l’altra kande la nomo Stuart esis mencionita. Li lore liberigis lia revolveri en la revolveruyi e preparis su por rapide voyajar.

“Qua trovis la kadavro di tua patro?” Maz questionis la yunulo del Trabo-T. “Homo nomizita Tab, ka ne?” Lu levis sua shultri kande Jimmy repetis la nomo. “Probable nur vaganto. Me ya questionos lu. Nu, kerli,” lu dicis turnante su a la Guardani, “ni devas hastar a la Jibeto-domeno. Ka vi es pronta?”

Ma Jimmy Kulun stacis e regardegis quaze trancante la afisho super la pupitro. Per la lumo dil recente acendita lampo lu povis tre klare vidar la fotografuro e lektar omna vorto sub ol. La du Guardani kurioze regardis Kulun.

“Quo esas, yunulo? Ka tu vidis ta homo?”
Magro Arden rapide questionis.

Kulun humidigis sua labii e glutis. Lu rikonocis la imajo. Ol esis di Tab. Lua okuli plularjeskis e lua voco raukeskis.

“To esas Tabor, la maxim serchata mortigisto en la Sudwesto,” Arden aboyis.
“Ka tu vidis lu?”

La yunulo del domeno esis partigita da luktanta emoci, la kredo a la sincereso di “Tab” e la respekto por autoritato. Lu esabis edukita kredar lo maxim mala pri pafisti mortiganta. Lu audabis pri Tabor. Preske omnu en Arizona audabis ta nomo, e pavoris pro ol.

Kad esas posibla ke Sonny Tabor mortigabis la patro e mentias? Ta pensajo flagris tra lua mento quale fulmino.

L’oficiri vartis lua respondo. Lu koncieskis pri la kreskanta suspekto en lia okuli. Lu mustas decidir.

Lu mentiis, quale jentilulo. Malgre la reputo di “Tab”, lu fidis a lu!

“No, me nultempe vidis ta homo,” lu dicitis.

Extere, la steli cintilifis en la blue velvura cielo. La lamp-lumo del drinkeji e butiki facis flava flaki sur la sinuifanta strado di Piedras. Li transiris la trotuaro a lia kavali.

La reda kavalo di Kulun esis spumizita, ma ankore sat forta. Kulun preparis acensar kande la sherifo tushis lua shultro.

“Ca homo, Tab, pri qua tu parolis,” lu grunis. “Quale lu esas? Tabor esis vidita en la regiono, e jus venis aden mea mento ke ca Tab povus—”

Kulun ne kustumis mentiar, e mustis rapide pensar.

“Tab esas alta bovgardisto evanta cirkume quaradek yari,” lu abrupte respondis.

“Nu, sato pri lu,” snortis Maz, e lu e la Guardani acensis lia kavali. “Ni irez.”

Li kune galopetis ek Piedras. Kulun kavalkis apud la sherifo, la du Guardani kavalkis genuo an genuo dop li. La Trabo-T-bovgardisto ja decidis to quon lu facos. Malgre omna rumori, lu ne kredis ke Sonny Tabor kulpas pri irgo ma to quo lu esas—chasata viro. Lu esez avertita.

Sonny, lu komprenis, expektos ke l’autoritatozi kavalkos direte al Jibetodomeno. Ton l’autoritatozi ya facas. Ma Jimmy Kulun komprenis, ke la proskriptito esez avertita. Lu esez informita pri la Guardani.

Esas kruco-voyo kelka kilometri sude de Piedras. Ibe du voyeti krucumas su por

vagar trans la valo adube e la Trabo-T e la Jibeto situesas. Un de olti duktas proxime a la domeno dil Ballister-fratuli, e l'altra pasas ne plu fore kam tri kilometri de la Kulun-domeno. Kande li atingis ta kruco-voyo, Jimmy Kulun haltis.

“Me kavalkos a la Trabo-T, sherifo, por esar kun mea matro,” lu rapide explikis.

“Esez bona, yunulo,” l'oficiro di Piedras hastoze konsentis. “Forsan esos pafado, omnakaze, adube ni iras, e ne esus bona ke tu kunirez.”

“Adio, yunulo!” Guardano Arden klamis. “Ni probable vizitos tua domeno plu tarde.”

La Trabo-T-domeno plue distis kam la Jibeto-domeno, e yuna Kulun savis, ke se lu avertos Sonny Tabor, lu mustas hastar. Spornagante la kavalo tam balde kam l'oficiri desaparabis, lu igis la fatigita kavalo kurar maxim rapide trans la dezerto.

L'autoritatozi ne kaptez Sonny se lu povas agar!

CHAPITRO V.

BEKASETO.

La ratatra bovgardisto del Trabo-T nomizita “Bekaseto”—e nulu savis lua altra nomo—departabis la Kulen-domeno tam balde kam lu audacis forreptar. Lu esis longatempa e sekreta kamarado di la Ballister-bandacho ye la Jibeto-domeno, e lu havis grava novaji por la homi qui ibe lojas. Bekaseto esis maligne ruzema. Lu iris nedirete tra la regiono ed atingis la Jibeto-domeno ye un horo pos noktesko.

La domeno-domo—ligna edificio blanke farbizita, situita profunde en paloverdo*-bosko, impresis on kom ulmaniere infama e desestiminda. Ula fenestri esis frakasita e reparacita per juta saki, la kameno esis ruinaĵo, la portiko esis subflexanta danjero. Vakua alkoholaj-boteli ed altra eskombri

* *Parkinsonia florida.*

pelmele kovris la gazono. L'inkluzeyi ed hangari, tamen, standis plu bone.

Alta luno kavalkis la cielo, jetis stranja ombri ed igis l'arjentea paloverd-arbori fantomatra. Nokt-ucelo traurale pipiis kande Bekaseto haltigis sua kavalo exter la domo.

Lu frapetis per partikulara maniero ed esis quik aceptata. Lu marchis aden sordida e desordinita chambro qua esis e dineyo e dormeyo por la Jibeto-bandacho. Ol bitrege odorachis de chipa alkoholaji.

Red Hunt esis sternita sur un de la liti, laute ronkis. Lu evidente dormis pro l'efekto di tro multa alkoholaji, ma nun lu vekis. Bill Prim lavis kamizo en rustoza baseno sur la furnelo, dum ke Webb Stuart diligente swabragis la tubi de un de sua Colt-revolveri. Kun ta tri homi esis quaresma employata da la bando—strabanta, trist-humora pafisto nomizita McMurk.

Li omna regardegis Bekaseto, lore Stuart ridetachis.

“Saluto, Bekaseto,” lu dicis. “Me parius ke me savas pro quo tu venas. Ulo eventis pri tua patrono ye la Trabo-T.”

La vizelo del Trabo-T senridete afirmis per kapsigno. “Tu es just, ulo eventis,” lu

nelaute dicis. “E tu eroris, kelkete, Stuart. Un de tua sporni esis trovita proxim la kadavro. Jimmy iris a Piedras por querar la sherifo.”

La laboristestro dil Jibeto-domeno regardis sua boti e nelaute blasfemis. “Me esis kurioza, ube me faligis olta,” lu grunis. “Nu, plu multa pruvi kam ico bezonesas por kondamnar, e me inventos alibio—”

“Ma tu ne povas, Webb,” Bekaseto negaye gutur-ridis. “Olda Jo esis trovita da yunulo qua vidis tu e l’altri kun Kulun che Milit-Danso.”

“Ta kindo?” Stuart volfatre grunachis. “Nu, me esez— Vartez, e me informos Abe e Jak.”

Lu iris aden l’apuda chambro e riaparis kun la proprietanti dil Jibeto-domeno, la du Ballister-fratuli. Abe, la seniora, esis long-gamba homo evanta plu kam quaradek yari. Lu esis desnete vestizita, e lua bufata, debochita vizajo esis kovrita per herisita barbo. Jak similesis lu, ecepte ke lu esis plu yuna, e grasoza, e se posible, lua okuli esis mem plu maligna e kruela.

Bekaseto e la sis homi dil Jibeto-domeno kunvenis cirkum la sordida tablo por konferar. La febla lumo dil fumanta stana

lampo lumizis lia leda vizaji, jetis tordita ombri adsur la tordita muri.

Pro le Ballister, Bekaseto repetis to quon lu dicabis a Stuart. La Trabo-T-trahizanto anke dicis ulo altra qua astonis omna kin homi.

“Me savas qua esas ta kindo,” lu dicis kun rideto plena de karita dento-stumpi. “Me rikonocis lu per la fotografuri sur la premio-afishi. Lu es Sonny Tabor!”

Red Hunt e Bill Prim astonate regardis l’una l’altra. Webb Stuart saltante staceskis, lua boko beis.

“Ka ta yunulo havanta infantala vizajo en la Milit-Danso?” lu klamis. “Nu, neposible!”

“Me es ya certa,” Bekaseto dicis.

“E lu nun esas che la Trabo-T?” grunis McMurk. “Se me juste rimemoras, esas granda premio por kaptar lu, mortinta o vivanta. Ni povus—”

“Sherifo Max arivos hike irginstante,” Bekaseto rimemorigis da li. “Ni mustas rapide inventar ulo. Lu arestos tu, Stuart, pro ocido. E pri me—nu, me devas quik retroirar al Trabo-T ante ke li suspektos. Se vi inventos ula moyeno ganar per la kranio-pelo di Tabor, me partoprenos.”

Lua misiono facita, Bekaseto adiiis la Jibeto-bandacho. Li audis ke lu acendas sua kavalo e forgalopas.

“Nu, sato!” grunis Jak Ballister. “Quon ni facez? Semblas ke tu tranis la Jibeto aden trublo kun l’autoritatozi, Webb. Me esperis ke ca domeno restez semblante inocenta. Ni ganis multa pekunio til nun.”

Webb Stuart acendis sigareto. “Li ne povas prubar multe kontre me, e nulo kontre vi,” lu dicis. “Kande la sherifo venos, me iros a Piedras kun lu, e pose vi—”

Abe Ballister profunde pensis, mordetis sua sordidega fingro-ungli e frunsis sua ne-alta fronto. Lore lu frapis la tablo per harizita pugno.

“Me havas ol!” lu klamis. “Maz es ociema. Ni negocios kun lu.”

“Quon tu volas, chefo?” questionis Prim.

“L’autoritatozi volas kaptar Tabor, volis lu dum multa yari,” explikis la seniora Ballister. “Ni revelos omno kande la sherifo venos. Ni dicos, ke ni kambios Tabor por Stuart. Se lu oblivios la pruvi kontre Stuart, ni dicos ube esas ta Tabor-yunulo. Lu probable avide konkordos.”

“To es ya bon ideo, e ni anke ganos ula parto di ta premio,” lua fratulo aprobis. “To efikos—”

Lu haltis. Selo-ledro stridis extere, e li audis la pedpazi di boti trans la portiko. La bandacho surprizite regardis l'una l'altra. To sonis quale plu kam un homo, e li ne expektabis ke Maz, qua kustumale sole laboras, venigez altri.

E ta surprizo esis desagreabla. Guardani! Homi quin li ne expektabis e ne volis aceptar. Ma esis tro tarda. Abe e Jak Ballister apertis la pordo, pretextis kordialeso ne vere sentita.

“Nu, nu, sherifo,” Abe pipiis per fingita astoneso. “Pro quo tu venas? Es granda—”

“Bona nokto,” kolde dicis l'oficiro di Piedras, lua regardo transiris la du false ridetanta Ballister-fratuli e severe atingis Webb Stuart. “Ni venas pro mal afero, Abe. Ca homi esas Arizona-Guardani.”

“Ka advere?” Abe dicis. Lu e lua homi ja konjektis lo. La fakto ke li esas nekonocata en la stat-distrikto ed esas kun sherifo Maz esis bona pruvo, malgre ke li portas nula insigni.

“Tu es arestita, Stuart!” la sherifo aboyis, e rapide pazis al mokridetanta e senrezista laboriestro. Lu extensis manoto.

“Tu ne bezonas tala kozo,” Stuart dicis, levante sua shultri. “Me venos kalme, pro

ke nulo opresas mea koncienco. Quo es l'akuzo?"

"L'ocido di Jo Kulun!" Maz kurte dicis.

Stuart feble ridetis, nam ton lu expektabis. Lua grimaso mortis, tamen, kande Guardano Magro Arden parolis.

"Ed anke pro la Brisbi-ocido, Stuart!" L'oficiro teritorial glaciatre ridetis.

"Yes, Stuart," dicis Guardano Kon. "Bela slingo di pendero vartas tu ibe. Se tu pardonos me, me alejos tu de ta fumo-tubi. Tu ne bezonos li."

Yen nova trublo! La sardonika vizajo di Stuart perdis sua insolenteso. Lu rajuntasas; lu ne povas vinkar pri ta Brisbi-afero, nam vidanti asistabis. Kelke aturdita, lu lasis su esar desarmizita ed esis quik manotizita.

"Nu, vartez dum minuto, oficir-hundi," interruptis Abe Ballister. "Me havas ulo dicar—ofro, o negocio, tale dicar."

La du Guardani severe regardis lu, ed esis nulo bona en ta regardo.

"Mea laboristestro esas tre valoroza a ca domeno," Abe komencis.

"Se me esus tu, homo, me ne konfesus lo," Guardano Arden komentis.

"E se tu indulgos lu," karezachis Ballister, "me informos vi pri *advera* kapto, kapto qua igos vi la maxim famoza oficiri en Arizona.

Me dicis a vi ube vi povas kaptar Sonny Tabor! Me savas ube lu esas, nun!”

La du Guardani rigideskis pro ta informo, e la sherifo anhelis. La novajo semblis tro bona esar vera.

Komprenante l’impresuro facita, Abe Ballister triumfante duris parolar:

“Lu esas nun che la Trabo-T, e se ocido esis ibe facita, esis lu qua facis ol—vi savas lua reputo. Me dicis lo, pro ke me savas ke tu indulgos mea laboristestro por kompensar ta informajo, e me—”

“Ni balde saveskos, se tua rakonto esas vera, Ballister,” abrupte dicis Magro Arden. “Ni nun iros adibe, e ni duktos Stuart kun ni. Ma komprenez ico, homo, e komprenez quik—la Guardani negocias kun nulu!”

“Ni ne darfas kambiar un kriministo por altru, mem un dil sorto de Tabor,” pluse dicis Tub Kon. “Venez, Stuart.”

Preske ante ke la Jibeto-maluli komprenis, la tri oficiri ekduktabis lia kaptito e pozis lu adsur la dorso di kavalo. La Guardano ne ludis! Stuart kavalkante inter li, e sherifo Maz sequante, li forgalopetis vers la Kulun-domeno.

“Tondro!” grondis Jak Ballister, trovante sua voco. “Stuart savas tro multo pri ni e

nia aferi. Ni ne lasez l'oficir-hundi havar lu!
Quon ni facez, Abe?"

L'altra Ballister-fratulo ekvarsis wiskio por su ante responder. Lua bufata vizajo esis purpura pro furio, e lua porkatra okuli cintilifis pro rezolvo.

"Ni certigos ke Webb Stuart ne esos enkarcerigita!" lu rauke dicis. "Nun askoltez," lu dicis min laute, e sideskis an la tablo, "tale ni facos lo."

Lu sorgeme skisis sua projeto—projeto qua, se sucesoza, eskrokos la slingo dil pendero de Webb Stuart ed acendos l'incendio di fumanta ocido.

CHAPITRO VI.

ALTRA KAPTO.

Kande siorino Kulun, exhaustita da chagreno, tandem dormeskis, Sonny e la du bovgardisti dil Trabo-T ekiris a la portiko por sideskar en lunlumo. Li nelaute konversis, e la ligili di amikeso ja nodigesis inter Tab e Kurto e Kalvo Bray.

Bekaseto ne esabis prezenta tra la vespero, e lua absenteso ekvokis kaustika komenturi de Kalvo e Kurto. Pro to audita, Sonny supozis ke Bekaseto ne esas tro populara, segun li. Nek segun Sonny ipsa, quankam la proskriptito ne povis exakte explikar pro quo.

“Tab, ka tu ne lasos ni sorgar tua kavalo kun tu?” olda Kalvo kurioze questionis. “Tua kavaletto stacas ibe apud la hangaro tro longe. Tante multa eventis, ke me ne pripensis la bestio ante nun.”

Sonny ya pripensabis Fardo! Ma il livabis la makulizita kavaletto repozar ibe, selizita e pronta por ula skopo.

Lu expektis ke la sherifo di Piedras aparez ye la Trabo-T canokte, e ye l'unesma indiko di lua veno, Sonny projetis neremarkite forglitar e "vizar la fora voyeti."

Il promisabis restar che la Trabo-T, promisabis a Jimmy ke il restos kun la matro til la riveno dil filiulo, ma la proskriptito ne intencis restar un plusa instanto. Forjetar ilua vivo esus vana. Il komprenis, ke esas fola restir tante longe.

"Me sorgos Fardo kelke plu tarde, amiki," il lente dicis.

Pro ula kauzo, la proskriptito sentis venanta dizastro. Il sentis ke ulo eventos. Esis tre tranquila, e la vasta ruro di dezerto e monti, extensante su omnalatere, semblis pacoze dormar sub la steli. Ma la nervi di Sonny similesis tensita metal-fili. Super la Trabo-T flugetis la nigra ali di morto.

"Askoltez, kerli, me opinionas, ke l'autoritatozi nun venas!" Kurto kriis pos sidir kelka minuti sur la portiko. "No, es stranja. Sonas quale nur un kavalo. Jimmy ne retrovenus sen la sherifo."

“Me iros por renkontrar lu,” Sonny rapide dicis, ed il saltis de la portiko ed hastis vers la rot-sulkizita furgon-voyo qua duktas cirkum la plu granda dil du inkluzeyi. Kaze ke krizo eventus, Fardo ne esos tro fora.

Il vidis, tamen, ke ta qua venas esas Jimmy Cullen, e lu venas sole. Omnakaze, to esis alejanta. Il ne mustas eskapar l’autoritatozi. Adminime, ne ja.

Kulun vidis lu ed haltigis sua kavalo cent metri de la domo, cirkume. Sonny vidis, mem per lunlumo, ke la kavalo dil yunulo esas parexhaustita. L’animalo esis spumizita, anhelanta, e klaudikanta.

La proskriptito ne esis preparata, tamen, por la vorti di Kulun; li perforis il quale kultelo.

“La sherifo e du Guardani esas ye la Jibeto-domeno—li probable ja venas adhike,” la mikra bovgardisto dicis dum glitar de sua selo. “Mea kavalo febleskis, o me esabus hike plu frue por avertar tu, Sonny Tabor.”

“Do, tu konocas me,” Sonny nelaute dicis. “Yes.”

“E ka li savas—me volas dicar, l’oficiri?”

Voc-muo ruptis la respondo di Jimmy Kulun. “No. Me mentiis. Li ne savas qua tu

advere esas, ma li venos irginstante, e tu—tu devas quik irar, amiko.”

Sonny sentis doloro en la kordio. Itere il mustas kurar, itere la hungroza, fumoza voyeto vartas il e Fardo. Il presis la manuo di Kulun e sentis la varma preso dil fingri dil yunulo.

“Danko, kamarado,” il susurante dicis. “Me iros nun. Tua matro standas plu bone, e tu devas irar al domo por sorgar el. Me esperas, ke omno finos sat bone. Adio!”

Turnante su de sua nova amiko, Sonny iris vers la hangaro dop qua vartas Fardo. Il preske kuris, nam il savis ke ilua presento esis justa—danjero pluproximeskas. Instinto avertabis il.

Ma ol ne informis il, ke danjero venas tante rapide! Mi-voye trans l’inkluzeyo al hangaro il nelaute siflis—signalo bone konocata da Fardo. Ma esis nula respondo, ne mem pos ke il plu laute repetis ol.

Ka la makulizita kavalo forvagas? La proskriptito ne tale opinionis. Il hastis plu rapide. Pos plusa instanto il cirkumiros l’angulo dil subflexanta hangareto.

Fardo esis foririnta! La fugero perplexe pauzis. Ilua makulizita kavaletto esis tam obediema e tam fidinda kam hundo. Il ne ligabis lu; il nultempe bezonis ligar lu. Ma

esis nulo ecepte ombri e lunlumo qua trairis la susuranta branchi dil koton-arbori* e paloverdi qui bordizis la prateto apud la rivero.

“Ne movez, Tabor!” imperis tenua voco. “Ne un movo, o me pafos truo tra tu. Tu es kaptita.”

Sonny ne unesme vidis Bekaseto, mem pos ke lu parolabis, nam la trahizanta vizeleto proxime presis su an la muro dil utensilo-hangaro. Tamen, lu lore ekpasis aden oblonga spaco lumizita da la luno, e la proskriptito sat klare vidis lu. Revolvero esis en singla manuo, apuntita ye Sonny de disto de apene tri metri.

Bekaseto ridetachis pro triumfo ed avideso; Sonny vidis l'ecitita tremo di lua febla mentono, la leda brilo di lua stretigita okuli.

“Me decidis ganar ta premio de sisamil dolari por me ipsa, infant-vizajo,” mokis la trompanta bovgardisto. “Ne savis, ke me esos tante fortuneza. Tu ne es tam venenatre danjeroza kam tua reputo indikas, Tabor, ka ne?” lu mokridetis. “Nun, ne movez,” lu itere avertis. “Me povas vidar tua du manui, e me plus preferus mortigar

* *Populus fremontii*.

tu kam ne, pro ke la premio esas ‘mortinta o vivanta’.”

Sonny experiencabis tro multa simile danjeroza kazi ne esar kalma dum ico. Il quik judikis pri la kapableso di ta homo. Bekaseto havas l’avantajo, yes. Ma ka vere? Sonny Tabor esis la maxim rapida homo en la Sudwesto pri revolveri, ed il sentis la komfortiganta pezo de oli an sua kruri.

“Me evidente juste judikis tu, Bekaseto,” Sonny kalme dicis.

Il volis incitar Bekaseto parolar; to esis la sola oportunajo. Se il povus distraktar l’aknezoa trahizanto mem nur dum fraciono di sekundo—

“Me esis tro inteligenta por tu, ka ne, Tabor?” Bekaseto mokis, glutante la lurilo. “Me iris al Jibeto-domeno pri afero pri tu, e riveninte, me vidis tua kavaletto. Me dicis a me, pro quo ne sole traktar Tabor? E ton me facis. Me fortranis tua kavalo—granda laboro, fakte—e lore me—”

Sonny vidis ke Bekaseto intencas mortigar il. Ed il agis ante ke Bekaseto povis. Il pafis Bekaseto e sendis lu mortar en la polvo.

La du Colt-revolveri di Sonny Tabor flagris e mujis. Ilua duopla tiro esabis tante fulminatre rapida, ke la trahizanto dil

Trabo-T esis frapita ante ke lua fingro povis tensar su an la destensilo. Bekaseto probable nultempe komprenis to quo eventis. Du kugli perforis lua pektoro, to esis la fino.

Itere Sonny Tabor mortigabis, ed ilua unika regreto esis, ke ol necesesis. Bekaseto invitabis ol.

Ripozante la fumanta pafili aden la revolveruyi, il kureskis vers l'apuda rango di paloverdo-arbori, pensante ke Bekaseto forsan celabis Fardo ibe. Ma Sonny ne fore iris. Transirante spaco lunlumizita, il audis la klikto dil perkutiti di Winchester-fusili.

“Levez ta manui, Tabor!” kune kantis la voci dil oficiri, e Sonny vidis, ke il esas kaptita.

Sinistre esis la plu alta de la du Guardani qua esforcabis arestar il plu frue tadie, e dextre il vidis du figuri sur kavali, vidis la brileto di stel-lumo sur la stalo di apuntita pafili.

Tafoye la proskriptito havis nula rekurso. Il cedis su.

CHAPITRO VII.

MORTO-VOYETO A PIEDRAS.

Ye jornesko, solena grupeto iris alonge streta voyeto qua sinuifis e tordis su tra la monti vers Piedras. La suno ne ja levis su, ankore esis nebuleto, plu fantomatra kam fumo, qua vorticis tra l'obskura ravini. La pini gutifis humideso, e l'unika bruiseti esis la strido di seli e la lenta, ritmoza tamburagado di hufi.

Esis kin homi en ta grupo frue kavalkanta—tri oficiri e du kaptiti irante vers la karcero di Piedras, ankore distanta de sis od ok kilometri.

Webb Stuart, manotizita e budema, sidis sur beja kavalo ed apud lu kavalkis Sonny Tabor, la manui ligita dop il per kordo. Il ne kavalkis Fardo, ma sidis sur negracioza bruna farm-kavalo prestita da la Trabo-T.

Guardani Kon ed Arden kavalkis direte dop ta du, lia fusili pronta, e sherifo Maz

venis dop li. Semblis esar ya triumfala dio por l'autoritatozi.

L'oficiri esis gaya, komprenende, pos tala suceso. Li esabis fortuneza, precipue, per kaptar Sonny Tabor, nam li galopante arivabis ye la domo dil Trabo-T dum la maxim bona instanto. La tempo ne povis esar plu bona.

“Ho, ma me hungras,” Guardano Tub Kon gutur-ridis. “Mea unesma ago atinginte Piedras esos manjar! Quale pladedo de fritita maiz-pano e lardo plezus a tu, Magro?”

“Shinko ed ovi por me,” dicis Arden.

Sonny naturale havis esperema e gaya karaktero, e mem lore il ne permisus sua desfortuno vinkar il. Il experiencabis multa danjeri ante lore. Morto ne timigis il; il tro ofte afrontis ol.

Webb Stuart boliante furiis. La slingo vartis lu, e lu savis lo. Lua magra, falkonatra vizajo esis senmova blanka maskilo, lua okuli kontenis l'ombro di timo ed odio. Lu blamis Sonny por lua propra desfortuno, e kontinue mokis e maledikis il.

“Li anke kaptis tu, e me omnakaze joyas pri *to!*” lu venenoze grunachis. “Ton tu meritas, infantatra malulo! Me havas

chanco ne esar mortigita, ma tu pendesos, Tabor, tam certe kam l'odoracho di mofeti!"

Sonny ne disipis respiro per replikar a la laboristestro di la Jibeto-domeno. Il regardis la glorioza pejzajo tra qua li pasas—brilante reda e flava klifi, verda foresto, e la cielo tante tenere blua super li. Uceli vekis e pipiis en la pini, ed unfoye cerveto havanta blanka kaudo kuris tra la avana arbustaro e desaparigis quale tremanta flagreto.

La yuna proskriptito sentis trananta ligilo inter su e ta saltanta animalo; en lia veini esis la sama sovaja ondo di pulsanta vivoso, la sama amo por libereso.

Plusa du kilometri duktos li al altaĵo dil paseyo, al somito, ube la voyeto adinfre sinuifis vers Piedras.

Subite priklis la grande sentiva nervi dil proskriptito. En ta densa arbustaro apud la voyeto, duadek metri avane—

"Atencez, omni!" il klamis, ed abasis su tam base kam posible sur sua pomelo.

Br-r-r-rang! Bang-bang! Red-oranjea pulvero-flamo flagris ek la kopso dum ke kin maskita kavalkanti hastis ek lia mortigiva embuskeyo. Fumo flugis adsupre ed esis batita til blua banderoli da la vento.

Lore eventis venis trapide. Magro Arden tenis la kordo di la kavalo di Sonny e la

proskriptito sentis ol tenseskar kande la kavalo dil Guardano kabris e saltis. Krio venis de Tub Kon, lauta blasfemo de l'astonata sherifo. Sonny vidis la vizajo di Stuart brilar pro profana joyo e triumfo. To signifikas salvo por lu!

La kin embuskanti agis per habila precizeso e rapide e bone parlaboris. Ante ke l'oficiri povis pafar plu kam un o du vana pafi, la maskita mortiganti sizabis la kavalo di Stuart ye la brido e galopabis aden la foresto, livis e Guardano Kon e sherifo Maz sternita sur la sulo.

“Adio, Tabor—salutez la pendero por me!” Webb Stuart klamis.

Magro Arden, l'unika oficiro ne vundita da ta salveo, standis male. Lu ne darfas persequar l'atakanti sen perdar la restanta kaptito. Lu anke ne volis abandonar Maz e sua Guard-amiko.

“La mofeti! La vizeli!” lu anhelis. “Nu, Tabor, me certigez me pri *tu*, adminime!”

Decensante, lu rapide ligis la kavalo di Sonny a pino apud la voyeto. Lore lu kuris a Tub Kon e la sherifo.

Maz ne esis male domajita, e ja shancelante staceskis. Vunduro alte en la shultro forfrapabis lu de lua kavalo, e la falo aturdabis lu dum instanto.

“Me—me standas sat bone, me supozas,”
lu anhelis dum ke Arden helpis lu
staceskar. “Esis ta Ballister-bandacho de la
Jibeto-domeno! Me es certa pri to, ma pro
ke li esis maskita, ni ne povus pruvar lo en
korto dum cent yari! La mofeti ya—”

“Tub Kon es mortinta!” kriis Arden per
sufokata voco. “Li pafis lu direte tra la
kapo!”

CHAPITRO VIII.

DESTRANQUILA DII.

Atinginte la chefurbo dil stat-distrikto, Sonny Tabor esis nemediate enkarcerigita, konfidita a Mexikiana deputito nomizita Pedro qua agis kom gardisto. La kelka sequanta dii esis ya plena de laboro por la sherifo e Guardano Arden, ma plena de enoyo e destranquilesa por la proskriptito.

La karcero havis un celulo konektita a la kontoro di Maz per stang-treliso ek dika fera stangi e stangizita pordo. L'edificio esis ek petro ecepte la pavimento, qua esis ek tampita briki, preske tam harda kam petro. L'unika fenestro esis nur quadrato larja de la triimo di un metro ed apene permisita on vidar leda stradeto.

Sonny esis tre sola dum ta dii, nam Maz e Guardano Arden laboris pri la Kon-ocido ed il rare vidis li.

La Guardano chanjesis. Lu nultempe ridetis, e lua vizajo sovaje aspektis. La proskriptito komprenis, ke l'ocido di lua kunguardano profunde perturbas lu.

Sonny parolis la Hispana plu bone kam Pedro parolis la Angla, ma la gardisto esis kelke desafabla e ne-ofte parolis.

La proskriptito saveskis, tamen, ke Maz ed Arden ne povas kolektar forta pruvi pri la kulpozeso dil Ballister-bandacho. Li multe suspektis, ma suspekto ne suficas por pendigar li. Esis mem ne sat multa pruvi por arestar li.

“Li mem ne trovas traco di Stuart,” Pedro dicis a Sonny. “Lu celas su ulaloke. Maz, lu opinionas ke le Ballister savas ube lu es, yes ya. Li observas ta domeno.”

Dum la triesma dio Sonny esis joyigita da vizito da Jimmy Kulun, Kurto, e Kalvo Bray. Li stacis ultre la stang-treliso, suspekteme regardata da Pedro, e konversis kun lu dum plu kam un horo.

“Ni plu balde venabus, Sonny,” Kulun exkuzis su, “ma esis la funero—e matro esez sorgita. Kad es irgo quon ni povas facar por tu, irgo quon li lasus ni adportar?”

“Es mala stando, Sonny,” dicis Kalvo kande la proskriptito ridetante negis per

kapsigno. “Tu ne esus en tala stando, se tu ne helpabus ni ye la Trabo-T.”

“Nur dicez, amiko, e ni facos omno posibla por ekigar tu!” Kurto rauke susuris, la mandibulo indignoze saliante.

Sonny esis emocigita da lia ne-expektita amikeso e loyaleso. Ma il kompreneble ne povis lasar li danjerigar li per temerara ago; longa karcerigo por li omna konsequus.

“Ka Fardo standas bone? Ka vi sorgas lu?” il anxioze questionis.

“Standas tote bone, Sonny!” Kurto ridetis, e plenigis sua ledratra vango per tabako. “Yes, sioro. Me ipsa sorgas ta makulizita kavaletto. Lu es kelke sola, tamen, e trista, Fardo es.”

Sonny parolis min laute. “Ka tu povas duktar Fardo aden l’urbeto morgo nokte, ye noktomezo, cirkume? Ka tu ligos lu trans la strado, distanta de un strado?”

“Nu, certe, Sonny! Quon tu projetas? Se ni povas alre helpar—”

La kuglo-fendureto en la vango di Sonny pluprofundeskis. Ma il dicis nulo plusa. Se il parolus, li divenus komplici. Por eskapar la karceron, il agez tote solitare.

“Adio, amiki, e vigilas pro ta Ballisterbandacho,” il dicis kande Pedro imperis, ke la vizitanti forirez.

SEQUANTADIE Sonny saveskis, ke la vunduro di sherifo Maz dolorigas lu, e ke lu mustas enlitigar su che su. Lore la Guardano sole laboris, e segun to quon Sonny saveskis per Pedro, lua tasko esis vana, pri pruvar la kulpozeso dil Jibeto-bando.

“Me opinionas ke la Guardano preske cedas su,” grunis la deputito tanokte. “Pos un o du dii, lu e me duktos tu a Tucson. Ibe li pendigos tu, *muchacho*.”

“Nu, yen bela novajo,” la proskriptito lente dicis.

Esis bona tempo esforcar eskapar! Il anke havis altra motivi por forirar. L’autoritatozi, til lore, faliis kaptar la Jibeto-bandacho, e Sonny opinionis, ke esas bona tempo ke *il* agez, se nur pro Jimmy e siorino Kulun. Li ne esos sekura dum ke ta oxidanti liberesas.

“Canokte,” il murmuris kande noktomezo pluproximeskis.

Esis nula aquo en ilua celulo; irgekande il volas drinkar, il mustas advokar Pedro, qua transdonas stana taso tra la stangi. Dum longa tempo il observabis e studiabis la metodo dil Mexikiana deputito dum facar ta tasko. Lore la projeto matureskis.

L’extera strado tranquileskis, e Pedro dormetis en sua sidilo avan la pupitro dil

sherifo. Tra la fenestro di ilua celulo, Sonny vidis l'amikala luno e kelka brilanta steli.

"*Quiero agua, Pedro!*" la proskriptito laute demandis.

La deputito grunis ulo per sua matralla linguo, iris al aquo-sitelo e prenis tasedo del varmeta liquido. Dormeme palpebragante, lu marchis portante la taso al stang-treliso. Aquo ekfluis dum ke lu marchis.

Esis nur sat multa spaco por ke lu povis trapasar la taso inter la fera stangi dil celulo, e lu facis lo per sua dextra mano—la pafilo-mano—qua probable esis lua maxim serioza eroro.

Vice prenar la taso, Sonny sizis la karmo di Pedro per stalatra tenego. La gardisto akute kriis ed esforcis violentoze liberigar su, ma to esis neutila. La proskriptito esis tre forta. Un granda trano portis la brakio di Pedro aden la celulo til la shultro.

"Pro quo—"

"Tua zono-buklo—tu povas atingar ol per l'altra mano! Desbuklagez ol!" imperis la proskriptito en rapida Hispana.

"Me ne facos lo!" anhelis la deputito.

Ma lu altre pensis kande Sonny fortege tordis lua brakio. Sudorifante, lu tastis ye sua zono. Lu desbuklagis, e la zono kun la kartochi e revolveruyo laute falis al

pavimento ye la bazo dil stangi, atingebla da Sonny.

“Nun me liberigos tu, prenos ta revolvero, ed apuntos tu!” Sonny abrupte avertis. “Saltez retroe, e pose stacez senmove!”

“Me facos lo!” ululis la sudorifanta Pedro.

Sonny prenis la .45-revolvero, ed imperis, ke Pedro apertez la pordo per sua klefo. La Mexikiano obediis—tre rapide! Pazante ek la celulo, la proskriptito inkluzis la gardisto en ol.

“E nun,” pensis Sonny, “se la kerli vartigis Fardo por me, quale li promisis—”

Apertante la pordo dil kontoro, il cirkonspekte regardis la strado. Ol semblis vakua, ed il glitante ekiris, buklagis la kartocho-zono di Pedro cirkum sua tayo dum irar.

Il ne ja povis vidar, ka Fardo esas ye l’assignita loko o ne, nam arboro ye la bordo dil strado jetis densa ombro, ed esis nula lumili ibe. Pos irir cent metri, tamen, il saveskos. Restante proxim l’edifici, il rapide pazegis vers sua skopo.

Sude del karcero, stradeto krucumis la chefa voyo di Piedras. Sonny jus transireskis ta tenebroza transversa voyo

kande il preske kolizionis kun homo venanta cirkum la strad-angulo.

Esis Guardano Magro Arden! La du homi quik rikonocis l'unu l'altru.

Ed amba homi quik agis! Sonny engainigabis la revolvero di Pedro, ma ol saltis ek la ledro quale flagro. Saminstante Arden ektiris sua propra pafilo. Li amba direte apuntis l'unu l'altru.

Sonny audis anhelado de Arden, audis la klikto dil perkutito samtempe kam sua propra. Esis morto, evidente, por li amba. Li amba esis experti pri pafado, li amba havis fera nervi. Ta du esis stalatra!

“Faligez ol, Magro!” Sonny kalme dicis.

“Faligez la tua,” venis la siflanta respiro dil Guardano, “o me faligos tu.”

“Tu darfas unesme pafar,” la proskriptito afable dicis. “Magro, me iras a la Jibetodomeno. Ka tu volas kunirar?”

La magra korpo di Arden videble laxeskis, ma lua pafilo ankore apuntis la tayo di Sonny. La proskriptito vidis chanjo en la mieno dil vizajo dil oficiro; mem per ta febla lumo il povis vidar la brilo qua kreskis en lua stretigita okuli.

Arden parolis sen movar la labii. “Tub Kon e me esis selo-amiki dum yari.”

“Me savas lo,” dicis la proskriptito. “Ka tu oblivios, dum ica nokto, ke tu esas oficiro?”

Magro subite engainigis sua pafilo. Sonny anke facis lo.

“Me supozis, ke tu tale opinionos,” il dicis. “Mea kavalo esas kelke plu fore alonge la strado, me esperas. Ka ni ireskez?”

Magro ne respondis, ma pazegis flanko an flanko kun la proskriptito, transiris la strado kun il. Ibe stacis Fardo!

La Guardano esis tre surprizita, tamen, vidar ke Jimmy Kulun, Kalvo Bray, e Kurto de la Trabo-T stacas ye la fosto. Omni esis surprizita. Dum un o du minuti nulu povis parolar. Esis ya extraordinara, vidar Arizona-Guardano e la maxim serchata proskriptito dil Sudwesto amikale kunmarchante!

Kurto ruptis la perturbanta silenco. Lua reda, ledratra vizajo apertis en larja rideto.

“Nu, me dicas, ke ico esas fortuno,” lu gutur-ridis. “Nun ta Ballister-mortigisti ye la Jibeto-domeno subisos malega horo.”

“Qua dicas, ke ni iros al Jibeto-domeno?” la Guardano abrupte questionis.

“Nu, ni, ka ne?” Kurto gaye respondis.

“Ni kavalkez,” dicis la Guardano.

CHAPITRO IX.

FUMAGAR VESPO-NESTO.

Ye tri kloki matine, cirkume, un horo ante jornesko, sola kavalkanto venis ek la dezerta sablo-kolini qua bordizis la domo dil Jibeto-domeno. Lu cirkonspekte kavalkis al domo, ye kinadek metri de ol decensis de la kavalo.

Dum kelka minuti lu intense askoltis dum judikar la stando dil loko. La luno preske desaparabis, ma omno esis lumizita da la steli, e lua atencema okuli vidis omno.

Pos kontentigir su ke omno standas bone, lu audacoze pazis al domo, transiris la subflexanta portiko, e laute frapetis la pordo.

Kande ta frapeto ne vekigis irgu, lu pedfrapeskis la pordo.

“Vekez interne!” lu kriis. “Es me—Webb Stuart.”

La voco di Abe Ballister, stupida pro dormo, feble respondizis lu. Lore lampo esis lumizita, la voci di viri grunis, e pos multa bruiso la pordo esis apertita, e Stuart esis permisata enirar.

La homi jus ekirabis lia liti, e nulu esis tote vestizita. Grondante e blasfemante, Red Hunt metis sua boti, e Bill Prim luktis kun kamizo, dum ke McMurd dormeme promenis werante nur pantalono. La du Ballister-fratuli, Abe e nemuskulala Jak, jus venabis ek lia propra chambro ed esis malhumora.

Li omna, tamen, weris lia pafili. Olti esis sempre la lasta kozi desmetita e l'unesma metita.

“Webb!” iracoze grunachis Jak. “Per qua damnita—”

“Ka nul malajo, ka ne?” Prim grunis.

“Me supozis, ke ni imperis ke tu celez su, Webb,” dicis Abe Ballister per severa voco. “Tu devis restar en ta celo-loko til ke omno esez obliiita. Certe manjaji ed alkoholaji ne mankas a tu.”

Stuart pezoze sideskis en sidilo apud la kolda furnelo. Lua akute skultita vizajo semblis mem plu magra e fatigita, ed esis chasata expresuro en lua okuli, nervoza

konvulsala moveto cirkum la dina labii di lua boko.

“Me ne plus toleros ta celo-loko,” lu jemis. “Es tro solitara. Ol afektas me. Me timas la nokti.”

“Esas plu bona kam esar kaptita da l’oficiri, ka ne, Webb?” Abe Ballister mokridetis.

“Me ne savas,” Stuart anhelis, e lua longa fingri tamburagis an la kroso dil Colt-revolvero en sua shultro-revolveruyo. “Esas vizajo—anke voco—qua frequentas me.”

“Vizajo di qua?” desestimante questionis Prim.

“Di Jo Kulun,” susuris l’ocidero, e pasis tremanta manuo trans sua humida fronto. “Me ankore vidas lu tiranta la levero di ta pario-mashino, e ridanta!”

“Sensenca!” mokridis Abe Ballister. Lua labio tordesis. “To es un ocido por qua tu nultempe pagos! Esis me, Webb, qua pafis la kapo di ta grasoza Guardano. Ka tu supozas, ke *lua* vizajo frequentas *me*? Ni es sekura, Webb, anke tu.”

“Yes,” mokridis McMurk. “Quale tu sentus, se tu restus en la karcero, quale ta Tabor?”

“Drinkez ulo ed obliviez, Webb,” urjis Jak Ballister.

La manuo di Webb Stuart tante violentoze tremis, ke lu acidente varsis la plumulto del wiskio, ma lu drinkis poka quanto, e to kelke fermigis lu.

“No, me livos ca regiono,” lu defiante dicis. “Me quik iros a Mexikia, e to quon me volas esas ke ni partigez la pekunio. Mea porciono di ta lasta afero es—”

“Quo es *to*?” kriachis Abe dum saltante staceskar.

Komence, Stuart opinionis ke Ballister ulmaniere objeccionas pri la partigo, lore lu vidis, ke Abe tote ne regardas lu, ma regardas la pordo dil domo.

“Quo es, Abe?” questionis Red Hunt. Lua karnoza manuo falis a la mancho di lua pafilo.

La bandacho vartis, intense askoltis. La stori ye la fenestri esis tiritita, quale sempre dum nokto. Lore esis nula sono, e la rigida figuro di Abe Ballister kelke laxeskis.

“Esis nulo, me supozas,” lu dicis. “Webb anxiigas ni per ta rakonto pri vizaji e voci. Forsan tu devas barar ta pordo, Red, omnakaze. Sempre es bona esar sorgema.

Red Hunt pazegis al pordo por barar ol, ma ante ke la leda danjerozulo povis atingar ol, la pordo adinterne apertesis

tante violentoze, ke ol ruptis de la supraĵo al bazo.

Du pari de ŝultri forsabis ol quale du arieti, ed aden la meskina chambro plunĵis du bovĝardisti quik rikonocita da la bandacho. Li ankore jiris pro la kolizio ed enhastis pro pura momento.

Li rikonocis l'altstatura homo kom Guardano Magro Arden. L'altru, ridetanta yunulo havanta blu okuli e weranta bruna getri e blue quadratizita kamizo esis la maxim timita pafisto en Arizona—Sonny Tabor. Dop ta du esis altra viri, ma la bandacho ne ja vidis qua o quanta.

“Luktez, meskina friponi—o reptez!” klamis Magro Arden, la vizajo tam harda kam granito.

Mem dum ke lu parolis, lua Colt-revolvero flagris flamo e fumo, nam la Jibeto-bando, rapide rekuperante su de la surprizo, ektiris lia pafili. Li ne cedos su. Ca kombato duos til fumanta fino!

Varmega vento estingis la flamo dil kerosen-lampo kande ta inferno eruptis. La chambro esis lumizita dal intermitanta brilo dil rapide pafanta Colt-i; fumo quirlis e vorticis kom griza bandoleri qui divenis la sepulto-tuko di morto ipsa. Red Hunt, unesmo avan l'altri, dansis dementa jigo

kande la kugli flugis tra lu. Lu jiris e falis kun stranja klamo.

Magro irabis addextre, dorso an la muro, e Sonny Tabor, qua provizabis su per plusa Colt-.45 de pos eskapar la karcero, movis quale ombro adsinistre. La proskriptito blotisis ed ilua pafili mujis de la nivelo di ilua genui.

Esis lore nulo pueratra en ta vizajo, malgre la kuglo-fendureto! Il ankore ridetis, ma ta rideto ne esis bona, ed ilua okuli esis glaciatra e senkompata.

Jak Ballister, la graseta juniora frato di Abe, falis dum ke lu tiris sua pafilo ek la ledro. Lu mortis preske instantale pro kuglo qua tranchis granda arterio en la fauco, e karmezino spricis al planko-sulo. Bill Prim mortis preske saminstante, lua pektoro aplastita da du kugli ek la tondranta Colt-i di Sonny.

Arden esis pafita en la bicepso. Lu shancelis, subtenis su per un manuo an la parieto, e duris pafar. Omno lore esis fumoza kaoso; la tablo esis renversita e la lampo falabis al planko-sulo, ube la mecho ankore brulis per flava flamo.

Adminime sis kugli esabis apuntita ye Sonny Tabor, e la muro dop il esis variol-markizita da multa kuglo-trui, ma il esis

tam desfacile pafita kam ombro, e ye omna rapida moveto e paso adlatere, ilua du .45-revolveri mujis destrukto.

“Vi mortigis mea amiko, viperi!” Magro klamis per voco plu lauta kam la meleo di pafado e kriado. “Nun vi subisas!”

Br-r-r-rang! Bang! Kr-a-a-ak! McMurk nexte mortis en ta frenezioza koshmaro di explozanta pafili.

Perforata da plura kugli, lu krumplesis an la furnelo e rulis de ol adsur la lenio-buxo.

Bang! La patro di Jimmy Kulun venjesis.

Flamo-lanco venis ek un de la bramanta Colt-i di Sonny vers Webb Stuart. La kuglo aplastis la kordio dil Jibeto-laboristestro jus kande lu preparis itere desesperante pafar. Sonny vidis Stuart saltar aden la aero, e falar quale mortinta arboro.

Nur sekundi pasabis de pos la frakaso dil pordo, ma en ta sekundi la Guardano falchabis pafil-rekolturo! Ante ke Kalvo Bray, Jimmy Kulun, e Kurto tote enirabis la chambro, omno esis preske finigita.

Plusa salveo, e la lasta hundo dil Jibeto-domeno esis faligita. Abe Ballister falis, lua pafilo ocideme ma vane sputante. Lu itere staceskis, ebriatre shancelis kande plusa kugli trairis lu, esforcis balbutar aden l'altra chambro. Lu falis ye la sulio.

Lore la bruisego di pafili haltis tam subite kam ol komencabis. Silenco itere plenigis la domo dil Jibeto-domeno ube Morto regnas.

GRUPETO DE KIN FATIGITA HOMI haltis en la dezerto por spektar la levo dil suno. L'estala cielo esis mola per la varma kolori di nova dio; la reda bordo dil suno ja esis vidita acensante dop la segatra monti, e longa bandoleri oranjea e purpura extensis su de l'una horizonto al altra. La kaktus-regoli vekis, e la dolca odoro di meskito flotacis en la aero.

“Hike me livos vi,” dicitis Magro, e fricionis sua nove bandajizita shultro. “Me iros a Piedras, me supozas, por saveskar pri la stando dil sherifo. Pose me—me demisionos me del Arizona-Guardo.”

“Ne facez lo,” rapide dicitis Sonny Tabor.

“Ma me es desloyal a mea devo,” la Guardano bitre dicitis. “Me devas adminime *esforcar* arestar tu, Sonny.”

“Do, bone, facez lo nun,” la proskriptito ridetis, e quik ektiris .45-revolvero ed apuntis ol ye Magro Arden. “Me ganis kontre tu, tu komprenas, e tu ne es blaminda, se me eskapas. Nu, forirez! Ed obliviez pri ta demisiono.”

“Ka ni darfas unesme presar la manui?”
Magro questionis kun lenta rideto.

“Me es fiera facar lo, Magro,” Sonny gutur-ridis, “e memorez—se ni ulfoye itere renkontros l’una l’altra, me lasos tu unesme pafar. Adio, amiko, e fortune a tu!”

Li spektis Magro Arden til ke lu esis punto ye la westala horizonto, lente movanta punto qua tandem desaparís inter la nebuleto aurorala. Sonny sospiris, lore solene turnis su a l’altri.

“Me supozas, ke es bona tempo ke me e Fardo adiez,” il regretoze dicitis. “Me opinionas, ke vi ne anxiez pri ta Jibeto-kombato. Magro ordinos omno segun la sherifo. Forsan, uldie, ni omna itere renkontros l’una l’altra.”

“Me—me esperas lo, Sonny,” Jimmy Kulun feble dicitis.

“Salutez tua matro por me, Jimmy, e vi altri—nu, sorgez elu.” La proskriptito ridetis. “Me joyas, ke me helpis.”

“Helpis!” olda Kalvo aboyetis. “Nu, ni tri nultempe mem pafis! Nur pro to me ne povas pardonar tu, Sonny. Me volis ipse pafar ta Webb Stuart!”

“Adio,” murmuris Kurto. Lu esforcis ridetar, ma l’esforco semblis dolorigar lua nebela vizajo, e lua okuli ne esis sika. “Ni

komprenas. Ni komprenas, ke tu mustas irar, ma”—voc-muo ruptis sua vorti—“adio, infantatra amaso de dinamito, e me deziras felica voyo a tu!”

Kun avida snorteto Farda forvalsis vers la sudesto, lua makulizita pelo brilanta en la lumo dil nova suno, lua krinaro e kaudo fluanta en la vento.

Itre la mastro di Fardo eskapabis la pendero. La dezerto advokas lu, ed esas tempo por irar.

FINO



Post Photo Studio
Orange, Calif.

PAUL S. POWERS
Author of
"Doc Dillahay"
(Macmillan)